

摘藻堂四庫全書薈要

史部

欽定四庫全書薈要

史部  
元史卷二十二至  
二十二



詳校官主事銜臣徐以坤

欽定四庫全書薈要卷六千三百九十九史部

元史卷二十

明翰林學士亞中大夫知制誥兼修國史宋濂等修

紀第二十

成宗三

三年春正月癸未朔暹番沒刺由羅斛諸國各以方物  
來貢賜暹番世子虎符丙戌太陰犯太白己丑中書省  
臣言天變屢見大臣宜依故事引咎避位帝曰此漢人

所說耳豈可一一聽從耶卿但擇可者任之庚寅詔遣使問民疾苦除本年內郡包銀俸鈔免江南夏稅十分之三增給小吏俸米置各路惠民藥局擇良醫主之封永和爾為定遠王賜金印命中書省自今后妃諸王所需非奉旨勿給各位擅置官府紊亂選法者戒飭之辛卯詔諸行省謹視各翼病軍浙西肅政廉訪使王遇犯贓罪託權幸規免命御史臺鞠治之壬辰安置高麗陪臣趙仁規於安西崔冲紹於鞏昌並笞而遣之以正其

附王諫擅命妄殺之罪復以王昨為高麗王遣工部尚書額森特穆爾翰林待制賈汝舟齎詔諭之追收拜特穆爾托克持哈喇婁行軍印中書省臣言比年公帑所費動輒鉅萬歲入之數不支半歲自餘皆借及別支臣恐理財失宜鈔法亦壞帝嘉納之仍令諭伊徹察喇等自今一切賜與皆勿奏癸巳以江南軍數多闕官吏因而作弊詔禁飭之以達爾罕哈喇哈斯為中書左丞相丁酉太陰犯西垣上將戊戌太陰犯右執法辛丑括諸

路馬隸蒙古軍籍者免之乙巳太白經天二月癸丑朔  
車駕幸柳林丁巳鄂勒哲等奏銓定省部官以次引見  
帝允之仍諭六部官曰汝等事多稽誤朕昔未知其人  
為誰今既閱視且知姓名其洗心滌慮各欽乃職復蹈  
前失罪不汝貸罷四川福建等處行中書省陝西行御  
史臺江東荆南淮西三道宣慰司置四川福建宣慰司  
都元帥府及陝西漢中道肅政廉訪司廣和琳甘州城  
詔縉山縣民戶為勢家所蔽者悉還縣定籍壬戌詔諭

江浙河南北兩省軍民已已熒惑犯五諸侯壬申加解

州鹽池神惠康王曰廣濟資寶王曰永澤泉州海神曰

護國庇民明著天妃浙西鹽官州海神曰靈感宏祐公

吳大夫伍員曰忠孝威惠顯聖王金齒國遣使來貢方

物庚辰車駕幸上都三月癸巳緬國世子信合八的奉

表來謝賜衣遣還命妙慈宏濟大師江浙釋教總統補

陀僧一山齋詔使日本詔曰有司奏陳向者世祖皇帝

嘗遣補陀禪僧如智及王積翁等兩奉璽書通好日本

咸以中途有阻而還爰自朕臨御以來綏懷諸國薄海  
內外靡有遐遺日本之好宜復通問今如智已老補陀  
僧一山道行素高可令往諭附商船以行庶可必達朕  
特從其請蓋欲成先帝遺意耳至於惇好息民之事王  
其審圖之甲午命何榮祖等更定律令詔軍官受贓罪  
重者罷職輕者降其散官或決罰就職停俸期年許令  
自効戊戌熒惑犯輿鬼陞御史臺殿中司秩五品乙巳  
行御史臺劾平章嘉琿受財三萬餘錠嘉琿復言平章



德呼布哈領財賦時盜鈔三十萬錠及行臺中丞張閻  
受李元善鈔百錠敕俱勿問戊申減江南諸道行臺御  
史大夫一員賜和琳軍鈔十萬錠夏四月辛亥朔駙馬  
曼濟岱所部匱乏以糧十三萬石賑之己未太陰犯上  
將丙寅填星犯輿鬼太陰犯心庚午申嚴江浙兩淮私  
鹽之禁巡捕官驗所獲遷賞辛未禁和琳戍軍竄名他  
籍自通州至兩淮漕河置巡防捕盜司十九所己卯以  
禮部尚書額古爾布哈為中書左丞賜和琳軍鈔五十

萬錠帛四十萬匹糧二萬石仍命和琳宣慰司市馬五千匹給之遼東開元咸平蒙古女直等人乏食以糧二萬五百石布三千九百匹賑之五月壬午罷江南諸路釋教總統所丙申太陰犯南斗海南速古臺速龍探奔奚里諸番以虎象及杪羅木舟來貢己亥太白犯畢庚子免山東伊蘓岱爾牧地歲輸粟之半禁阿爾拉部毋於廣平牧馬庚子復征東行中書省以福建平海省平章政事奇爾濟蘓為平章政事是月鄂岳漢陽興國常

澧潭衡辰沅寶慶常寧桂陽茶陵早免其酒課夏稅江  
陵路旱蝗弛其湖泊之禁仍竝以糧賑之六月辛亥鄂  
蘭鄂端慶通擅殺所部軍之逃亡者命樞密院戒之癸  
丑罷大名路所獻黃河故道田輸租戊午申禁海商以  
人馬兵仗往諸番貿易者以福建州縣官類多色目南  
人命自今以漢人叅用禁福建民冒稱權豪佃戶規免  
門役庚申太陰掩房丁卯熒惑犯右執法壬申歲星晝  
見賜和琳戍軍鈔一百四十萬銳鷹師五十萬一千餘

錠秋七月己卯朔太白犯井庚辰中書省臣言江南諸寺佃戶五十餘萬本皆編民自楊總攝冒入寺籍宜加釐正從之丙申揚州淮安屬縣蝗在地者為鶩啄食飛者以翅擊死詔禁捕鶩丁未太陰犯輿鬼八月己酉朔日有食之丁巳太陰犯箕戊辰太白犯軒轅大星己巳太陰犯五車星賜定遠王永和爾所部鈔萬五千錠是月汴梁大都河間路水隆興平灤大同宣德等路雷雹九月癸未聖誕節駐驛古策受諸王百官賀庚寅置河

東山西鐵冶提舉司壬辰流星色赤尾長丈餘其光燭地起自河鼓沒於牽牛之西有聲如雷癸巳罷括宋手號軍乙未太陰犯昴距星丁酉太白犯左執法己亥車駕還大都揚州淮安早免其田租冬十月戊申朔有事于太廟壬子冊巴約特氏為皇后甲寅復立海北海南道肅政廉訪司山東轉運使阿里沙等增課鈔四萬一千八百錠賜錦衣人一襲丙子太陰犯房賜圖古勒布哈等所部戶鈔三萬七千餘錠橐駝戶十萬二千餘錠

以淮安江陵沔陽揚廬隨黃旱汴梁歸德水隴陝蝗並  
免其田租十一月庚辰置浙西平江湖渠閘堰凡七十  
八所禁和琳釀酒乙酉太白犯房戊子釋囚二十八丁  
酉浚太湖及澱山湖己亥賜隆福宮牧駝者鈔十萬二  
千錠諸王哈達部十萬錠雲南王額森特穆爾及所部  
三萬八千錠和琳戍軍一百四十萬餘錠幣帛二萬九  
千匹杭州火江陵路蝗並發粟賑之十二月己酉徙鎮  
巢萬戶府戍沅靖毗陽萬戶府戍辰均州萬戶府戍

常德澧州賜諸王烏呼訥銀印丙寅詔各省戍軍輪次  
放還二年供役陞宣徽院為從一品癸酉詔中書省貨  
財出納自今無券記者勿與以守司徒集賢院使領太  
史院事諤爾根薩里為平章政事賜諸王陸實托克托  
等鈔一萬三千餘錠四集賽衛士五萬二千餘錠千戶  
薩哈勒鄂蘭所部四萬錠淮安揚州饑甘肅額齊訥路  
屯田旱並賑以糧

四年春正月丙申申嚴京師惡少不法之禁犯者黥刺

杖七十拘役辛丑詔蒙古都元帥伊蘓岱爾非奉旨勿  
擅決重刑命和琳軍借鄂拓克錢者止償其本癸卯復  
淮東漕渠賜諸王達實特穆爾金印賜翰林承旨桑節  
鈔五百錠以養其母賜諸王摩和納所部一萬二千餘  
錠巴勒喇實等部六萬錠二月丁未朔日有食之乙卯  
遣使祀東嶽丙辰皇太后崩明日祔葬先陵戊午太陰  
犯軒轅壬戌帝諭何榮祖曰律令良法也宜早定之榮  
祖對曰臣所擇者三百八十條一條有該三四事者帝



曰古今異宜不必相沿但取宜於今者甲戌發粟十萬石賑湖北饑民仍弛山澤之禁罷青海屯田改置於罕扎之地以農具種實給之乙亥車駕幸上都置西京太和嶺屯田立烏撒烏蒙等郡縣併會理泗川西州為二置維摩州丙子命李庭訓練各衛軍士賜晉王所部鈔四萬錠三月乙未寧國太平兩路旱以糧二萬石賑之夏四月丙午朔詔雲南行省釐革積弊壬子高郵府寶應縣民孫奕妻朱一產三男蠲復三年丙辰置五條河

屯田丁已免今年上都隆興絲銀大都差稅地租賜諸  
王額默根蓋金印緬國遣使進白象戊午叅政張頤孫  
及其弟珪等伏誅于隆興市頤孫初為新淦富人胡制  
機養子後制機自生子而死頤孫利其貲與珪謀殺之  
賂郡縣吏獲免其僕胡忠訴主之冤于官乃誅之其貲  
悉還胡氏以中書省斷事官布呼齊為平章政事賜皇  
姪哈尚所統諸王戍軍馬二萬二千九百餘匹五月癸未左  
丞相達爾罕遣使來言橫費不節府庫漸虛詔自今諸

位下事闕錢穀者毋輒入聞帝諭集賢大學士諤爾根  
薩里等曰集賢翰林乃養老之地自今諸老滿秩者陞  
之勿令輒去或有去者罪將及汝其諭中書知之增雲  
南至緬國十五驛驛給圓符四驛券十二甲午太陰犯  
壘壁陣辛丑太白犯輿鬼太陰犯昴復延慶司賜諸王  
伊奇哩部鈔二萬錠巴爾都爾蘇所隸戶六萬五千餘  
錠是月同州平灤隆興電揚州南陽順德東昌歸德濟  
寧徐濠芍陂旱蝗真定保定大都通薊二州水六月已

酉詔立緬國王子窟麻刺哥散八為緬國王賜以銀印  
及金銀器皿衣服等物丙辰以太傅伊徹察喇為太師  
鄂勒哲為太傅皆賜印丁巳太白犯填星御史中丞博  
果密卒貧無以葬賜鈔五百錠甲子置耽羅總管府詔  
各省自今非奉命毋擅役軍以和琳都元帥府兼行宣  
慰司事吊吉而瓜哇暹國蘇八等國二十二人來朝賜  
衣遣之秋七月甲戌朔右丞相鄂勒哲請上徽仁裕聖  
皇后謚寶冊乙酉緬國阿散哥也弟者蘇等九十一人

奉方物來朝詔命餘人留安慶遣者蘇來上都辛卯熒

惑犯井加乳母冀國夫人韓氏為燕冀國順育夫人舒

穆魯氏為冀國夫人杭州路貧民乏食以糧萬石減直

糶之八月癸卯朔更定蔭敘格正一品子為正五從五

品子為從九中間正從以是為差蒙古色目人特優一

級置廣東鹽課提舉司癸丑太陰犯井庚申緬國阿散

吉牙等昆弟赴闕自言殺主之罪罷征緬兵甲子辰星

犯靈臺上星大名之白馬縣旱閏八月庚辰熒惑犯輿

鬼庚子車駕還大都以中書右丞賀仁傑為平章政事  
賜晉王所部糧七萬石九月戊午太白犯斗壬戌太陰  
犯輿鬼曹州特默齊軍與民訟地百二十頃詔別以鄰  
近官田如數給之廣東英德州達嚕噶齊托歡徹爾招  
降羣盜二千餘戶陞英德州為路立三縣以托歡徹爾  
為達嚕噶齊兼萬戶以鎮之甲子太白犯斗改中御府  
為中政院賜諸王徹伯爾部鈔萬五千四百餘錠建康  
常州江陵饑民八十四萬九千六十餘人給糧二十二

萬九千三百九十餘石冬十月癸酉朔有事于太廟十

一月壬寅朔詔頒寬令免上都大都隆興大德五年絲  
銀稅糧附近秣養馬駝之郡免稅糧十分之三其餘免  
十分之一徒罪各減一半杖罪以下釋之江北荒田許  
人耕種者原擬第三年收稅今並展限一年著為定例  
併遼陽省所轄狗站牛站為一仍給鈔以調其乏命省  
臺差官同實保齊鞫和琳運糧稽遲未至者真定路平  
棘縣旱十二月癸酉御史臺臣言所糾官吏與有司同

審所以事沮難行乞依舊制中書凡有改作輒令監察御史同往非宜自今非奉旨勿遣皆從之庚寅熒惑犯軒轅癸巳太陰犯房距星晉州達嚕嚕齊訥古伯給稱母喪歸迎其妻事聞詔以其戮傷彝倫罷職不敘遣劉深哈喇岱鄭祐將兵二萬人征八百媳婦仍敕雲南省每軍十人給馬五匹不足則補之以牛賜諸王實都部鈔五萬錠烏魯斯布哈等四部二十一萬九千餘錠西都守城軍二萬八千餘錠賑建康平江浙東等處饑民



糧二十二萬九千三百餘石

五年春正月己酉太陰犯五車庚戌給征八百媳婦軍  
鈔總計九萬二千餘錠壬子太陰犯輿鬼積尸氣奉安  
昭睿順聖皇后御容于護國仁王寺罷檀景兩州採金鐵  
冶提舉司以其事入都提舉司御史臺臣言官吏犯  
贓及盜官錢事覺避罪逃匿者宜同獄成雖經原免亦  
加降黜庶奸偽可革從之丙寅以兩淮鹽法澀滯命轉  
運司官兩員分司上江以整治之仍頒印及驛券辛未

太陰犯心二月己卯太陰犯輿鬼以劉深哈喇岱並為  
中書右丞鄭祐為參知政事皆佩虎符分雲南諸路行  
中書省事仍置理問官二員郎中員外郎都事各一員  
給圓符四驛券二十罷福建織繡提舉司增河間轉運  
司鹽為二十八萬引罷其所屬清滄深三鹽司丁亥立  
征八百媳婦萬戶府二設萬戶四員發四川雲南囚徒  
從軍乙未詔廉訪司官非親喪遷葬及以病給告者不  
得離職或以地遠職卑受任不赴者臺憲勿復用丙申

給托克托等部馬萬匹丁酉車駕幸上都詔雲南行中書省減內外諸司官千五百一十四員增江浙戍兵戍戍賜昭應宮興教寺地各百頃興教仍賜鈔萬五千錠上都乾元寺地九十頃鈔皆如興教之數萬安寺地六百頃鈔萬錠南寺地百二十頃鈔如萬安之數己亥凡軍士殺人姦盜者令軍民官同鞫永寧路總管瓊磋來朝獻馬三十餘匹賜幣帛有差三月甲辰收故軍官金銀符戍申太陰犯御女己酉罷陝西路拘權課稅所壬

子賜諸王伊蘓等鈔一萬八千五百錠戊午馬來忽等  
海島遣使來朝賜金素幣有差給和琳貧乏軍鈔二十  
萬錠諸王永和爾所部鈔萬五千九百餘錠丁卯熒惑  
犯填星己巳熒惑填星相合詔戒飭中外官吏命遼陽  
行省平章薩蘭將萬人駐夏山後人備馬二匹官給其  
直夏四月壬申太陰犯東井癸酉遣推勒特穆爾等犒  
和琳軍壬午以晉王噶瑪拉所部貧乏賜鈔四十萬錠  
調雲南軍征八百媳婦癸巳禁和琳釀酒諸王駙馬許

自釀飲不得沽賣是月大都彰德廣平真定順德大名  
濮州蟲食桑五月商州隕霜殺麥河南妖賊醜斯等伏  
誅已酉給伊埒克呼克軍駐夏山後者市馬鈔八萬八  
千七百餘錠辛亥遣竒拉爾岱托克托帥師征四川癸  
丑太陰犯斗乙卯熒惑犯右執法丙辰曲靖等路宣慰  
使管軍萬戶呼嚕蘇來朝壬戌雲南土官宋隆濟叛時  
劉深將兵由順元入雲南雲南右丞烏呼納調民供餽  
隆濟因給其衆曰官軍徵發汝等將盡剪髮黥面為兵

身死行陣妻子為虜衆惑其言遂叛丙寅詔雲南行省  
自願征八百媳婦者二千人人給貝子六十索丁卯太  
白犯井六月乙亥平江等十有四路大水以糧二十萬  
石隨各處時直賑糶開中慶路昆陽州海口甲申歲星  
犯司怪丙戌宋隆濟率猫狯紫江諸蠻四千人攻楊黃  
寨殺掠甚衆己酉緬王遣使獻馴象壬辰宋隆濟攻  
貴州知州張懷德戰死梁王遣雲南行省平章綽和爾  
叅政布呼齊將兵禦之殺賊首撒月斬首五百級癸巳

太白犯輿鬼歲星犯井甲午太白犯輿鬼賜諸王尼格  
布拉克妃扎古勒沁部鈔二十萬錠是月汴梁南陽衛  
輝大名濮州旱大都路水順德懷孟蝗秋七月戊戌朔  
晝晦暴風起東北雨雹兼發江湖泛溢東起通泰崇明  
西盡真州民被災死者不可勝計以米八萬七千餘石  
賑之己亥增階沙二州戍軍庚子籍安西王所侵占田  
站等四百餘戶為民賜寧遠王庫庫楚所部鈔二萬三  
千餘錠乙巳遼陽省大寧路水以糧千石賑之丙午歲

星犯井丁未命御史大夫托和齊整飭臺事詔軍官受  
贓者與民官同例量罪殿黜命監察御史審覆扎爾古  
齊罪囚檢照蒙古翰林院案牘戊申立耽羅軍民萬戶  
府諸王額默根薨以其子帕克巴拉嗣己酉詔諸司嚴  
禁盜賊辛亥太陰犯壘壁陣賜諸王徹伯爾等部鈔六  
萬錠又給市馬直三十八萬四千錠癸丑詔禁輝和爾  
僧陰陽巫覡道人咒師自今有大祠禱必請而行違者  
罪之浙西積雨泛溢大傷民田詔役民夫二千人疏導



河道俾復其故命雲南省分蒙古射士征八百媳婦庚申辰星犯太白癸亥哈坦之孫托歡自北境來歸其父母妻子皆遭殺虜賜鈔一千四百錠給諸王妃扎古勒沁及諸王徹伯爾軍鈔四十萬中書省言舊制京師州縣捕盜止從兵馬司有司不與遂致淹滯自今輕罪乞令有司決遣重者從宗正府聽斷庶不留獄且民不冤從之以按巴阿固岱並知樞密院事禁富豪之家役軍詔封贈非中書省無輒奏請青海至北境十二站大雪

馬牛多死賜鈔一萬一千餘錠命御史臺檢照宣政院  
并僧司案牘陞太醫院為二品以平章政事大都護提  
點太醫事托音納爾為太醫院使賜上都諸匠鈔二十  
一萬七千四百錠大都保定河間濟寧大名水廣平真  
定蝗八月戊辰給軍人羊馬價及定遠王所部鈔十四  
萬三千錠己巳平灤路霖雨灤漆泚汝河溢民死者衆  
免其今年田租仍賑粟三萬石庚午推勒特穆爾等自  
和琳犒軍還言和琳屯田宜令軍官廣其墾闢量給農

具倉官宜任選人可革侵盜之弊從之甲戌遣色辰額  
呼等將兵征金齒諸國時征緬師還為金齒所遮士多  
戰死又接連八百媳婦諸蠻相效不輸稅賦賊殺官吏  
故皆征之庚辰詔遣官分道賑恤凡獄囚禁繫累年疑  
不能決者令廉訪司具其疑狀申呈省臺詳讞仍為定  
例各路被災重者免其差稅一年貧乏之家計口賑恤  
尤甚者優給之小吏犯贓者並罷不敘征緬萬戶移喇  
福山等進馴象六壬辰太陰犯軒轅御女乙未填星犯

太微上將順德路水免其田租九月癸丑放青海守倉  
庫軍還令以次更代丙辰江陵常德澧州皆旱並免其  
門攤酒醋課乙酉自八月庚辰禁出井厯紫微垣至天  
市垣凡四十六日而減冬十月丙辰朔以畿內歲饑增  
明年海運糧為百二十萬石己巳緬王遣使入貢戊寅  
雲南武定路土官羣則獻方物癸未太陰犯東井壬午  
車駕還大都丙戌以歲饑禁釀酒弛山澤之禁聽民捕  
獵湖廣行省臣言海南海北道宣慰司都元帥府不

與軍務遇有盜竊惟行文移比迴已不及事今乞以其  
長二人領軍務又鎮守官慢功當罰者已有定例獲功  
當賞者乞或加散官或授金銀符皆從之撥南陽府屯  
田地給新籍輝和爾戶俾耕以自贍仍給糧三月丁亥  
詔軍官既受命而不時赴者病故不行者被差事畢不  
即還者准民官例違限六月選人代之被代者期年始  
敘改鄂州路為武昌路遣使就調雲南四川福建廣東  
廣西官諭百司凡事關中書省者毋得輒奏權豪勢要

之家佃戶貸糧者聽於來歲秋成還之癸巳分碓門黎  
雅軍戍蠻夷命陝西屯田萬戶額布根等將之辛卯夜  
有流星大如杯光燭地自北起近東分為二星沒於危  
宿十一月己亥歲星犯東井詔諭中書近因禁酒聞年  
老需酒之人有預市而儲之者其無釀具者勿問罷湖  
南轉運司弘州種田提舉司以其事入有司降容象橫  
賓路為州平灤金丹提舉司為管勾陞昭州為平樂府  
省泌縣入唐州丁未遣劉國傑及額森呼圖克將兵萬

人巴拉及阿都齊將兵五千人征宋隆濟減直糶米賑  
京師貧民設肆三十六所其老幼單弱不能自存者廩  
給五月選六御扈從漢軍習武事仍禁萬戶以下毋令  
私代犯者斷罪有差戊申太陰犯昴徭人藍賴率丹陽  
三十六洞來降以賴等為融州懷遠縣簿尉立長信寺  
秩三品十二月甲戌歲星犯司怪給安西王所部軍士  
食令各還其家候春調遣辛卯太陰犯南斗征東行省  
平章竒爾濟蘇以不能和輯高麗罷定強竊盜條格凡

盜人孳畜者取一償九然後杖之是月汴梁歸德南陽  
鄧州唐州陳州和州襄陽汝寧高郵揚州常州蝗峽州  
隨州安陵荆門泰州光州揚州滁州高郵安豐霖汴梁  
之封丘武陽蘭陽中年延津河南澠池蘄州之蘄春廣  
濟蘄水旱大名宣德奉聖歸德寧海濟寧般陽登州萊  
州益都濰州博興東平濟南濱州保定河間真定大寧  
水是歲斷大辟六十一人

六年春正月癸卯詔千戶百戶等自軍逃歸先事而逃



者罪死敗而後逃者杖而罷之没入其男女乙巳中書  
省臣言廣東宣慰副使托歡察爾收捕盜賊屢有勞績  
近廉訪司劾其私置兵杖擅殺土寇等事遣官鞫問實  
無私罪乞加獎諭命賜衣二襲晉王噶瑪拉薨命封其  
王印及內史府印丙午京畿二十一站闕食命賜鈔萬  
二千七百餘錠陝西旱禁民釀酒以雲南站戶貧乏增  
馬及鈔以優恤之中書省臣以朱清張瑄屢致人言乞  
罷其職徙其諸子官江南者于京丁未命江浙平章阿

里專領其省財賦庚戌詔官吏犯罪已經赦宥者仍從覈問海道漕運船令特默齊軍與江南水手相參教習以防海寇江南僧石祖進告朱清張瑄不法十事命御史臺詰問之帝語臺臣曰朕聞江南富戶侵占民田以致貧者流離轉徙卿等嘗聞之否臺臣言曰富民多乞護持璽書依倚以欺貧民官府不能詰治宜悉追收為便命即行之毋越三日詔自今僧官僧人犯罪御史臺與內外宣政院同鞫宣政院官徇情不公者聽御史臺

治之增諸王達實特穆爾歲賜銀二百五十兩雜幣百匹乙卯築渾河堤長八十里仍禁豪家毋侵舊河令屯田軍及民耕種增劉國傑等軍仍令屯戍險隘俟秋進師命濟古爾岱阿里等整治江南影占稅民地土者中書省臣言御史臺廉訪司體察體覆前後不同初立臺時止從體察後立按察司事無大小一皆體覆由是憲司之事積不能行請自今除水旱災傷體覆餘依舊例體察為宜從之以大都平灤等路去年被水其軍應赴上

都駐夏者免其調遣一年詔軍官除邊遠出征其餘遇  
祖父母父母喪依民官例立限奔赴禁畜養鷹犬馬馳  
等人擾民乙未以諸王珍通誣告濟南王謫置劉國傑  
軍中自效壬戌填星犯太微垣上將二月庚午太陰犯  
昴謫諸王博羅於四川巴拉軍中自效癸酉增諸王徹  
伯爾軍三千人人備馬二匹官給直丙戌遣陝西首平  
章伊蘇岱爾叅政汪惟勤將川陝軍湖廣平章劉國傑  
將湖廣軍征亦乞不薛一切軍務並聽伊蘇岱爾劉

國傑節制罷征八百媳婦右丞劉深等官收其符印驛券以京師民乏食命首臺委官計口驗實以鈔十一萬七千一百餘錠賑之癸巳帝有疾釋京師重囚三十八人三月丁酉以旱溢為災詔赦天下大都平灤被災尤甚免其差稅三年其餘災傷之地已經賑恤者免一年今年內郡包銀俸鈔江淮以南夏稅諸路鄉村人戶散辦門攤課程並蠲免之壬寅太陰犯輿鬼命僧設水陸大會七晝夜癸卯歲星犯井甲寅太陰犯鉤鈴合祭昊

天上帝皇地祇于南郊遣中書左丞相達爾罕哈喇哈  
斯攝事夏四月乙丑朔太白犯東井丁卯詔曲赦雲南  
諸部蠻夷發通州倉粟三百石賑貧民釋輕重囚三十  
八人人給鈔五錠乙亥濬永清縣南河戊寅太陰犯心  
庚辰上都大水民飢減價糶糧萬石賑之戊子修盧溝  
上流石徑山河隄釋重囚車駕幸上都庚寅太白犯輿  
鬼真定大名河間等路蝗五月乙巳給貧乏漢軍地及  
五丁者一頃四丁者二頃三丁者三頃其孤寡者存恤

六年逃散者招諭復業戊申太廟寢殿災癸丑謫和琳  
潰軍征雲南其戰傷而歸及嘗奉晉王令旨諸王永和  
爾所免者不遣丁巳福州路饑賑以糧一萬四千七百  
石濟南路大水揚州淮安路蝗歸德徐州邳州水六月  
癸亥朔日有食之太史院失於推筭詔中書議罪以聞  
填星犯太微西垣上將甲子建文宣王廟於京師辛未  
享于太廟乙亥太陰犯斗安南國以馴象二及朱砂來  
獻甲申賜諸王噶達遜托歡托里特穆爾巴雅爾鄂勒

哲所部鈔四萬五千八百錠湖州嘉興杭州廣德饒州  
太平婺州慶元紹興寧國等路饑賑糧二十五萬一千  
餘石大同路寧海州亦饑以糧一萬六千石賑之廣平  
路大水秋七月癸巳朔熒惑填星辰星聚井庚子太陰  
犯心己酉亦乞不薛土官三人棄家來歸賜金銀符衣  
服戊午太陰犯熒惑辛酉賜諸王帕克巴拉托克托呼  
伊奇哩額默根等鈔四萬三千九百餘錠以江浙行省  
叅政和爾多卜丹為中書右丞建康民饑賑米二萬石



大都諸縣及鎮江安豐濠州蝗順德水八月甲子詔御  
史臺凡有司婚姻土田文案遇赦依例檢覆乙丑熒惑  
犯歲星己巳熒惑犯輿鬼辛巳太陰犯昴壬午太白犯  
軒轅九月乙未遣阿雅噶齊薩哈勒圖會計青海屯田  
歲入數自今令宣慰司官與阿爾台共掌之甲午賜諸  
王烏魯斯布哈所部鈔六萬錠丙午熒惑犯軒轅丁未  
中書省臣言羅里等擾民宜依例決遣置屯田所從  
之賜諸王巴咱爾等鈔八萬六千三百餘錠己酉龍興

民譌言括童男女至有殺其子者命誅其為首者三人  
癸丑太陰犯輿鬼丁巳太白犯右執法賜諸王訥古德  
勒等鈔五千八百四十錠冬十月甲子改浙東宣慰司  
為宣慰司都元帥府徙治慶元鎮過海道置大同路黃  
花嶺屯田罷軍儲所立屯儲軍民總管萬戶府設官六  
員仍以軍儲所宣慰使帕哈哩鼎掌之南人林都鄰告  
浙西廉訪使張珪收藏禁書及推算帝五行江浙運使  
哈濟亦言珪沮撓鹽法命省臺官同鞠之丙子車駕還

大都壬午熒惑犯太微西垣上將濟南濱棣泰安高唐  
州霖雨米價騰湧民多流移發粟賑之併給鈔三萬錠  
十一月辛卯填星犯左執法甲午劉國傑裨將朱光率  
兵大敗蛇節賜衣二襲授以金符乙未辰星犯房癸卯  
太陰犯昴己酉太陰犯軒轅庚戌禁和琳軍釀酒惟安  
西王阿南達諸王呼喇珠托克托布色伊奇哩駙馬曼  
濟岱鴻吉勒岱雅爾哈許釀辛亥以同知樞密院事哈  
達知樞密院事詔江南寺觀凡續置民田及民以施入

為名者並輸租充役戊午籍河西寧夏善射軍隸親王  
阿穆爾克甘州軍隸諸王徹伯爾已未詔驛使枉道者  
罪之十二月庚申朔熒惑犯填星辛酉御史臺臣曰言  
自大德元年以來數有星變及風水之災民間乏食陛  
下敬天愛民之心無所不盡理宜轉災為福而今春霜  
殺麥秋雨傷稼五月太廟災尤古今重事臣等思之得  
非荷陛下重任者不能奉行聖意以致如此若不更新  
後難為力乞令中書省與老臣識達治體者共圖之復

請禁諸路釀酒減免差稅賑濟飢民帝皆嘉納命中書  
即議行之雲南地震戊辰又震甲子衡州袁舜一等誘  
集二千餘人侵掠郴州湖南宣慰司發兵討之獲舜一  
及其餘黨命誅其首謀者三人餘者配洪澤芍陂屯田  
其脅從者招諭復業乙丑歲星犯輿鬼乙亥太陰犯輿  
鬼丙子劉國傑額森呼圖克來獻蛇節羅鬼等捷庚辰  
熒惑犯太微東垣上相命中書省更定略賣良人罪例  
癸未太陰犯房保定等路饑以鈔萬錠賑之是歲斷大

辟三人

元史卷二十

欽定四庫全書薈要卷六千四百史部

元史卷二十一

明翰林學士亞中大夫知制誥兼修國史宋濂等修

本紀第二十一

成宗四

七年春正月戊戌太陰犯昴甲辰太陰犯軒轅丙午定  
諸改補鈔罪例為首者杖一百有七從者減二等再犯  
從者杖與首同為首者流已酉以歲不登禁河北甘肅

陝西等郡釀酒益都諸處牧馬之地為民所墾者畝輸  
租一斗太重減為四升弛饑荒所在山澤河泊之禁一  
年賑諾海貧乏戶米八千石壬子罷歸德府括田乙卯  
詔凡為匿名書辭語重者誅之輕者流配首告人賞鈔  
有差皆籍沒其妻子充賞命御史臺宗正府委官遣發  
朱清張瑄妻子來京師仍封籍其家資拘收其軍器海  
舶等丁巳命樞密院選軍士習農業者十人教軍前屯  
田賜伊特格勒達噶金五十兩銀千兩鈔千錠幣帛百



匹二月壬戌詔中書省汰諸有司冗員仍令諭樞密院  
除出征將帥外掌署院事者定其員數以聞辛未以平  
章政事行上都留守茂巴爾斯陝西行省平章阿喇卜  
丹並為中書平章政事江南行臺御史中丞尚文為中  
書左丞江浙行省參知政事董士珍為中書參知政事  
壬申詔樞密院宗正府等自今每事與中書共議然後  
奏聞諸司不得擅奏遷調官員雖經特旨用之而于例  
未允者亦聽覆奏甲戌減杭州稅課提舉司冗員丙子

詔和琳軍以六年更戌仍給鈔以周其乏命西京伊蘓  
岱爾軍及大都所起軍皆以四月至上都五月赴北丁  
丑命諸王徹伯爾非急務勿遣乘驛詔中書省設官自  
左右丞相以下平章二員左右丞各一員參知政事二  
員定為八府戊寅太陰犯心己卯盡除內郡饑荒所在  
差稅仍令河南省賑恤流民給北師鈔三十八萬錠以  
安南陳益稷久居鄂州賜鈔千錠以侍御史托迪為中  
書參知政事御史臺臣言江浙行省平章阿里左丞高

蕭安祐僉省張祐等詭名買鹽萬五千引增價轉市於人乞遣省臺官按問從之太原大同平灤路饑竝減直糴糧以賑之庚辰命陝西甘肅行省賑鳳翔秦鞏甘州哈瑪爾貧戶監察御史杜肯構等言太傅右丞相鄂勒哲受朱清張瑄賄賂事不報壬午帝語中書省臣曰比有以歲課增羨希求爵賞者此非撝克於民何從而出自今除原額外勿以增羨作正數罷江南財賦總管府及提舉司禁內外中書省戶部轉運司官不得私買鹽

引罷致用院禁諸人毋以金銀絲線等物下番罷江南  
都水庸田司行通政院併大都鹽運司入河間運司其  
所掌京師酒稅課令戶部領之禁諸人非奉旨毋得以  
寶貨進獻汰諸色人冒充宿衛及諸王駙馬妃主部屬  
濫請錢糧者真定路饑賑鈔五萬錠仍諭諸王錫錫及  
鷹師等毋於真定近地縱獵擾民丙戌詔除征邊軍士  
及兩都站戶外其餘人戶均當徭役丁亥詔自今除樞  
密院御史臺宣政院依舊奏選諸司毋得擅奏其舉用

人員並經中書省三月己丑朔保定路饑賑鈔四萬錠

庚寅詔遣奉使宣撫循行諸道以郝天挺達春往江南  
江北石珪往燕南山東耶律希逸劉賡往河東陝西特  
哩托歡戎益往兩浙江東趙仁榮岳叔謨往江南湖廣  
茂巴爾陳英往江西福建塔斯哈雅劄敏中往山北遼  
東並給二品銀印仍降詔戒飭之江浙行省平章托克  
托遣發朱清張瑄家屬其家以金珠重賂之托克托以  
聞帝曰朕以江南任卿果能爾真男子事也其益恪勤

乃事賜以黃金五十兩都城火命中書省與樞密院議  
增巡防兵甘肅行省供軍餼糧多弊詔徙廉訪司于甘  
州壬辰定大都南北兵馬司姦盜等罪六十七以下付  
本路七十七以上付伊克扎爾古齊河間路禾稼不登  
命罷修建僧寺工役乙未真定路饑賑鈔六百六十餘  
錠中書平章巴延梁德珪段真諤爾根薩里右丞巴特  
瑪琳沁左丞額古爾布哈參政密喇卜和卓張斯立等  
受朱清等賄治罪有差詔罷之以洪君祥為中書右丞

監察御史言其曩居宥密以貪賄黜乞別選賢能代之  
不報甲辰詔定贓罪為十二章京朝官月俸外增給其  
祿米外任官無公田者亦量給之乙巳以征八百媳婦  
喪師誅劉深答哈喇岱鄭祐罷雲南征緬分省戊申索  
羅希岳鉉等進大一統志賜賚有差己酉追收原降除  
免和顧和市璽書以托歡誣告諸王托克托謫置湖廣  
軍前自效罷甘肅行省差調民兵及取勘軍民站戶家  
屬孳畜之數庚戌以特爾格徹爾所收阿雅噶齊戶仍

隸諸托克托癸丑樞密院臣及監察御史言中丞董士  
選貸朱清張瑄鈔非義帝曰臺臣稱貸不必問若言者  
不已後當杖之甲寅車駕幸上都丙辰賜諸王錫錫部  
等鈔六萬錠賑李陵臺等五站戶鈔一千四百餘錠遼  
陽等諸路饑賑鈔萬錠夏四月癸亥太陰犯東井詔省  
臺樞密院通政院凡呼召大都總管府官吏必用印帖  
其餘諸司不得輒召徵藩臣陳天祥張孔孫郭筠至京  
師以天祥孔孫為集賢大學士筠為昭文館大學士皆



同議中書省事丙寅太陰犯軒轅庚午以中書文移太繁其二品諸司當呈省者命止關六部中書左丞相達爾罕言僧人修佛事畢必釋重囚有殺人及妻妾殺夫者皆指名釋之生者苟免死者負冤於福何有帝嘉納之辛未流朱清張瑄子孫於遠方仍給行費乙亥歲星犯輿鬼太陰犯南斗庚辰蛇節降令海拉蘇將兵五千守之餘衆悉遣還各戍撥碣門四川軍人一千人鎮羅羅斯其土軍修治道路者悉令放還甲申熒惑犯太微

垣右執法丁亥歲星犯輿鬼誅蛇節衛輝路辰州螟濟  
南路隕霜殺麥五月己丑給和琳軍鈔三十八萬錠開  
上都大都酒禁其所隸兩都州縣及山後河東山西河  
南嘗告饑者仍悉禁之詔雲南行省整飭錢糧壬辰辰  
星犯東井以大德五年戰功賞北師銀二十萬兩鈔二  
十萬錠幣帛各五萬九千匹賜皇姪哈尚及安西王阿  
南達諸王托克托班布爾實駙馬曼濟台等各金五十  
兩銀珠錦幣有差丙申遣征緬回軍萬四千人還各戍

癸卯詔和琳軍糧除歲支十二萬石其餘非奉旨不得擅支丁未綽和爾來朝以戰功賜金五十兩銀四百兩仍給其萬戶所隸貧乏軍鈔六十九萬餘錠辛亥奉使宣撫耶律希逸劄賡言平陽僧徹爾威犯法非一有司憚其豪強不敢詰問聞臣等至潛逃京師中書省臣言宜捕送其所令省臺宣政院遣官雜治從之甲寅濬上都灤河乙卯以昌通王五戶絲分給諸王達實特穆爾令甘州站戶為僧人圖爾哈等隱藏者依例還役詔中

外官吏無職田者驗俸給米有差其上都甘肅和琳諸處非產米地惟給其價禁諸王班布爾實部於般陽等處圍獵擾民詔諸宿衛士除官員子弟曾經奏准者留餘悉革去禁諸王駙馬母輒杖州縣官吏違者罪王府官立和琳宣慰司都元帥府以呼喇珠遙授中書省左丞為宣慰使都元帥賜諸王納古爾鈔千錠幣三十匹濟寧東昌濟南般陽益都蟲食麥太原龍興南康袁瑞撫等路高唐南豐等州錢減直糶糧五萬五千石東平益

都濟南等路蝗般陽路隕霜閏五月戊午朔日有食之

以伊納克特穆爾庫庫楚鴻和沒於軍賜其家鈔有差

壬戌詔禁犯曲阜林廟丁卯平江等十五路民饑減直

糴糧三十五萬四千石戊辰太陰犯心己巳以諸王博

囉珍通討賊有功徵詣京師鄂勒哲薨庚午雲南行省

平章伊蘓岱爾入朝以所獲軍中金五百兩為獻帝曰

是金卿効死所獲者賜鈔千錠丁丑禁諸王駙馬等征

北諸軍以奴為代者罪之辛巳詔僧人與民均當差役

癸未各道奉使宣撫言去歲被災人戶未經賑濟者宜免其差役從之命江浙行省右丞董士選發所籍朱清張瑄貨財赴京師其海外未還商舶至則依例籍沒甘肅行省平章哈克繖等侵盜官錢十六萬三千餘錠鹽引五千餘道命省臺官徵之詔上都路應昌府伊奇喇斯和林等處依內郡禁酒丙戌罷營田提舉司汴梁開封縣蟲食麥六月己丑御史臺臣言瓜沙二州自昔為邊鎮重地今大軍屯駐甘州使官民反居邊外非宜乞以

蒙古軍萬人分鎮險隘立屯田以供軍實為便從之罷  
四川宣慰司立四川行中書省以雲南行省平章托克  
托湖廣行省議事平章程鵬飛竝為平章政事壬辰武  
岡路饑減價糶糧萬石以賑之給欵察千戶等貧乏者  
鈔三萬七千八百餘錠癸巳叛賊雄挫來降乙未以亦  
乞不薛就平留特默齊軍二千人討阿永叛蠻餘悉放  
還庚子西京道宣慰使帕哈哩鼎以瑟瑟二千五百餘斤  
鬻于官為鈔一萬一千九百餘錠有旨除御榻所用外

餘未用者宜悉還之命阿巴阿固岱等整飭河西軍事  
癸卯詔凡軍官子弟年及二十者與民官子孫同俸直  
一年方許襲職萬戶於樞密院千戶於行省百戶於本  
萬戶乙巳罷行省僉省浙西淫雨民饑者十四萬賑糧  
一月仍免今年夏稅并各戶酒醋課命甘肅行省修阿  
哈潭曲尤壕以通漕運大寧路蝗秋七月辛酉常德路  
饑減直糶糧萬石以賑之壬戌御史臺臣言前河間路  
達魯噶齊躬幹賽音轉運使珠嘉德壽皆坐贓罷今躬幹



賽音以獻鷹犬除大寧路達嚕噶齊珠嘉德壽以德呼

默色妄奏其被誣復除福寧知州竝宜改正不敘以載

姦貪從之禁僧人以修建寺宇為名賫諸王令旨乘傳

擾民汰宿衛士丙寅達爾罕哈喇哈斯為中書右丞相

知樞密院事戊辰歲星犯軒轅丙子給四川行省驛券

十二道詔除集賢翰林老臣預議朝政其餘三品以下

年七十者各陞散官一等致仕立和琳兵馬司罷遼東

宣慰司丁丑中書臣言大同稅課比奉旨賜乳母楊氏

其家倍斂過數擾民為甚勅賜鈔五百錠其稅課依例輸官御史臺臣言湖南輸糧百石者出驛馬一疋廣海地狹所輸不及百石者所出亦如之故官以鹽引助其不給每馬一疋貴州以北給鹽十七引以南二十引近立椎鹽提舉司官價增五之三原給二十引者宜與鈔十七錠十七引者十五錠從之罷江南白雲宗攝所其田令依例輸租都勒幹徹伯爾穆爾特穆爾等遣使請息兵命安西王慎飭軍士安置驛傳以俟其來戊寅賜

諸王紐掄巴延額布根等鈔九萬錠罷諸王所設總管  
府叛賊麻你降貢金五百兩童男女二百人及馬牛羊  
却之己卯太陰犯井乙酉熒惑犯房賜諸王奇爾婁等  
部鈔幣有差八月己丑罷護國仁王寺原設江南營田  
提舉司給安西王所部貧民米二萬石辛卯夜地震平  
陽太原尤甚村堡移徙地裂成渠人民壓死不可勝計  
遣使分道賑濟為鈔九萬六千五百餘錠仍免太原平  
陽今年差稅山場河泊聽民採捕癸巳太白犯氏伊嚕

布哈將昂吉爾軍赴雲南道卒以其子布哩頁代之甲午熒惑犯東咸太陰犯牽牛庚子中書省臣言帕哈哩禹輸運和琳軍糧其負欠計二十五萬餘石近監察御史亦言其侵匿官錢十三萬餘錠臣等議遣官徵之不足則籍沒其財產從之乙巳歲星犯軒轅庚戌緬王遣使獻馴象四辛亥熒惑犯天江賜諸王圖卜特穆爾子額森博恰所部等鈔六千九百餘錠九月戊午車駕還大都丙寅太白晝見以太原平陽地震禁諸王阿濟格

錫錫所部擾民仍減太原歲飼馬之半遣刑部尚書塔  
齊爾翰林直學士王約使高麗以其國相吳祈專權徵  
詣闕問罪卒未焚惑犯南斗詔諭諸司賑恤平陽太原  
甲戌太陰犯東井乙亥太白犯南斗丙子罷僧官有妻  
者壬午辰星犯氐復茂巴爾斯平章政事冬十月丁亥  
太白經天御史臺臣劾言江浙行省平章阿里不法帝  
曰阿里朕所信任臺臣屢以為言非所以勸大臣也後  
有言者朕當不怒戊子弛太原平陽酒禁以浙江年穀

不登減海運糧四十萬石己丑詔從軍醫工止復其妻  
子戶如故辛卯復立陝西行御史臺癸巳御史臺臣及  
諸道奉使言行省官久任與所隸編氓聯姻害政詔互  
遷之以濟爾噶呼知樞密院事給大都文宣王廟洒掃  
戶五乙未發雲南叛寇餘黨未革心者來京師留蛇節  
養子阿闕于本境以撫其民改平灤為永平路陞甘州  
為上路設刑部獄吏一員以掌囚徒安西轉運司於常  
課外增算五萬七千四百錠人賜衣一襲以勸其功詔

諸司凡錢糧不經中書省議者勿奏庚子改普定府為  
路隸曲靖宣慰司以故知府容直妻適姑為總管佩虎  
符以敘州宣慰司為敘南等處諸部蠻夷宣撫司辛丑  
太陰犯東井庚戌翰林國史院進太祖太宗定宗睿宗  
憲宗五朝實錄辛亥詔軍戶貧乏者存恤六年增蒙古  
國子生百員十一月甲寅朔賜諸王阿濟格所部鈔二  
十萬錠糧萬石命鷹師圍獵毋得擾民以順元隸湖廣  
省併海道運糧萬戶府為海道都漕運萬戶府給印二

亦乞不薛賊黨魏傑等降人賜衣一襲遣還俾招其首  
亂者丁巳詔大同靜州隆興等路運糧五萬石入和琳  
己未太白經天辛酉木冰甲子命依十二章斷僧官罪  
丙寅鎮星犯進賢戊辰太陰犯井辛未陞全寧府為路  
己卯太陰犯東咸遣諸王穆齊特伊魯音特穆爾使徹  
伯爾十二月甲申朔詔內郡比歲不登其民已免差者  
蠲免其田租乙酉弛京師酒課許貧民釀酒丙戌太白  
經天熒惑犯壘壁陣戊子以平宋隆濟功增諸將秩賜



銀鈔等物有差其軍士各賜鈔十錠放歸存恤一年丙

申太陰犯東井辛丑太陰犯明堂詔撫諭順元諸司免

大德七年民間逋稅命江南浙西官田奉特旨賜賚者

許中書省迴奏賜皇姑魯國大長公主鈔一萬五千錠

幣帛各三百匹加封真武為元聖仁威玄天上帝丁未

太陰犯天江以轉輸軍餉勞免思播二州及潭衡辰沅

等路稅糧一年常澧三分之一淘金站戶無種佃者免

雜役一年七道奉使宣撫所罷贓污官吏凡一萬八千

四百七十三人贓四萬五千八百六十五錠審冤獄五千一百七十六事是歲斷大辟十人

八年春正月己未以災異故詔天下恤民隱省刑罰雜犯之罪當杖者減輕當笞者並免私鹽徒役者減一年平陽太原免差稅三年隆興延安及上都大同懷孟衛輝彰德真定河南安西等路被災人戶免二年大都保定河間路免一年江南佃戶私租太重以十分為率減二分永為定例仍弛山場河泊之禁聽民採捕庚申以

雲南順元同知宣撫事宋阿重生獲其叔隆濟來獻特

陞其官賜衣一襲置掌薪司以供尚食令宣徽院掌其

事癸亥禁錮朱清張瑄族屬乙丑復置遂平新蔡真陽

太和沈邱賴上拓城城父邾舞陽十縣丙寅以御史中

丞太僕卿塔斯布哈為中書右丞江南行臺中丞趙仁

榮為參知政事陞教坊司三品庚午以年扎克嘉勒燦

為帝師卒己詔諸王妃主及諸路有馬者十取其一諸

王駙馬往遼東捕海東鶻者毋給驛自滎澤至睢州築

河防十有八所給其夫鈔人十貫駙馬伊勒噶珠所部  
民饑以糧二千石賑之是月平陽地震不止已修民屋  
復壞二月丙戌增置國子生二百員選宿衛大臣子孫  
充之降莊浪路為州併隴干縣入德順州辛卯命諸王  
徹伯爾部軍屯田于繖察克酬谷甲午詔父子兄弟有  
才者許竝居風憲徙江東建康道廉訪司治于寧國其  
建康路簿書命監察御史鈎考丙申分軍千人戍嘉定  
州甲辰翰林學士承旨色勒默進金書世祖實錄節文

一冊漢字寶錄八十冊減宿衛繁冗者丙午車駕幸上

都勅軍人姦盜詐偽悉歸有司賜太祖位齊哩克昆戶鈔

萬八千二百錠布帛萬匹賜圖沁及塔喇海以所籍朱

清張瑄田人六十頃近侍鷹坊齊哩克昆鈔二萬七千

三百錠布帛萬二千匹賜平章政事王慶端玉帶半俸

終身三月丁巳詔軍民官已除以地遠官卑不赴者奪

官不敘軍官擅離所部者遣還翼遼者論如律軍人不

告所部私歸者杖而還之乙丑自去歲十二月庚戌彗

星見盈尺在室十一度入紫微垣至是滅凡七十四日  
戊辰中書左丞尚文以疾辭不允詔諸王駙馬所分郡  
邑達嚕噶齊惟用蒙古人三年依例遷代其漢人女直  
契丹名為蒙古者皆罷之勅軍民逃奴有獲者即付其  
主主在他所者赴所在官司給之仍追逃奴鈔充獲者  
賞逃及誘匿者論罪有差詔諸路牧羊及百至三十者  
官取其一不及數者勿取中書省臣言自內降旨除官  
者果為近侍宿衛踐履年深依已除敍嘗宿衛未官者

視散官敘始歷一考準為初階無資濫進降官二級官高者量降各位下再任者從所隸用三任之上聽入常調蒙古人不在此限從之雲南黎州盜劫伊蘓岱爾家屬貲產命宣政院督其郡邑捕之給諸王徹伯爾部馬萬三千五百疋庚辰詔內外使以軍務行者至其地有司給饋十五日自餘重事八日細事三日命凡為衙兵者皆半隸屯田仍諭各衛屯官及屯田者視其勤惰以為賞罰陞分寧縣為寧州罷廬州路榷茶提舉司溧城

濟陽等縣隕霜殺桑夏四月丙戌置千戶所戌定海以防歲至倭船永寧路叛寇雄控來降命僧道為高者輸稅凡諸王駙馬徵索有司非奉旨輒給者罪且罷之詔諸路輝和爾哈瑪爾自相訟者歸都護府與民交訟者聽其有司專決甲午詔朝廷諸王駙馬進捕鷹鷂皆有定戶自今非鷹師而乘傳冒進者罪之庚子以永平清滄柳林屯田被水其逋租及民貸食者皆勿徵丁未分教國子生於上都賜西平王鄂囉齊哈達等部民鈔萬



錠都爾蘇等站戶鈔二千二百錠銀三百九十兩有奇  
益都臨朐德州齊河蝗五月癸丑朔日有食之辛酉以  
所籍朱清張瑄江南財產隸中政院己巳以平宋隆濟  
功賜諸王托克托伊奇哩平章綽和爾等銀鈔金幣玉  
帶及大理金齒曲靖烏撒烏蒙宣慰等官銀鈔各有差  
壬申罷福建都轉運鹽使司以其歲課併隸宣慰司中  
書省臣言吳江松江寶海口故道潮水久淤凡湮塞良田  
百有餘里況海運亦由是而出宜於租戶役萬五千人

濬治歲免租人十五石仍設行都水監以董其程從之  
追收諸王驛券癸酉定館陶等十七倉官品級諸糧十  
萬石以上者從七品五萬石以上者正八品不及五萬  
者從八品庚辰以去歲平陽太原地震宮觀摧圮者千  
四百餘區道士死傷者千餘人命賑恤之是月蔚州之  
靈仙太原之陽曲隆興之天城懷安大同之白登大風  
雨電傷稼人有死者大名之濬滑德州之齊河霖雨汴  
梁之祥符太康衛輝之獲嘉太原之陽武河溢六月癸

未開和琳酒禁立酒課提舉司丁酉汝寧妖人李曹驢  
等妄言得天書惑衆事覺伏誅益津蝗汴梁祥符開封  
陳州霖雨蠲其田租扶風岐山寶雞諸縣旱烏撒烏蒙  
益州忙却東川等路饑疫並賑恤之秋七月辛酉罷江  
淮等處財賦總管府癸亥諸王格藏自西域遣使來貢  
珍物賜諸王伊蘇特穆爾等鈔二十萬錠成北千戶十  
五萬錠齊哩克昆等九萬餘錠西平王鄂囉齊二萬錠  
以順德恩州去歲霖雨免民租四千餘石八月太原之

交城陽曲管州嵐州大同之懷仁雨雹隕霜殺禾杭州  
火發粟賑之以大名高唐去歲霖雨免其田租二萬四  
千餘石九月癸丑車駕至自上都庚申巴延梁德珪並  
復為中書平章政事巴特瑪琳沁復為中書右丞密喇  
卜和卓復為參知政事以江浙行省平章阿里為中書  
平章政事庚午以戶部尚書張祐為中書參知政事癸  
酉諸王徹伯爾都勒斡等遣使來附賜以幣帛六百匹  
詔諸王凡泉府規營錢非奉旨毋輒支貸給諸王徹伯

爾部帛四百匹四川雲南鎮戍軍家居太原平陽被災者給鈔有差潮州颶風起海溢漂民廬舍溺死者衆給其被災戶糧兩月以冀孟輝雲內諸州去歲霖雨免其田租二萬二千一百石冬十月己卯有事于太廟辛巳給諸王阿濟格所部馬料價鈔三千九百錠以宣徽使大都護長壽為中書右丞陝西行省右丞托歡為中書參知政事丁亥安南遣使入貢詔諸王駙馬毋乘驛以獵庚寅封皇姪哈尚為懷寧王賜金印仍割瑞州戶六

萬五千隸之歲給五戶絲直鈔二千六百錠幣帛各千匹戊戌命省臺院官鞫高麗國相吳祈及千戶石天輔等以祈離間王父子天輔謀歸日本皆笞之徙安西十一月壬子詔內郡江南人凡為盜黥三次者謫戍遼陽諸色人及高麗三次免黥謫戍湖廣盜禁繫馬者初犯謫戍再犯者死以平陽太原去歲地大震免其稅課一年遣劄用院使和琳翰林直學士林元撫慰高麗放遼陽民樂亦等三百九十戶為兵者還民籍丁卯復免僧

人租戊辰以武備卿特古勒德爾為御史大夫壬申詔僧姦盜殺人者聽有司專決寧遠王庫庫楚以馬萬五百餘疋給軍命以鈔五萬二千五百餘錠償其直增海漕米為百七十萬石十二月庚子復立益都淘金總管府辛丑封諸王徹伯爾為威武西寧王賜金印賜安西王阿南達諸王阿濟格伊蘓布爾罕等鈔一萬四千錠九年春正月丁巳太陰犯天關戊午帝師年扎克嘉勒燉卒賻金五百兩銀千兩幣帛萬疋鈔三千錠仍建塔

寺甲子太陰犯明堂以昂吉兩部民張道奴等舊權為

軍者復隸民籍己巳太陰犯東咸壬申弛大都酒禁甲

戌賜諸王鄂勒哲實都實喇拜布哈等所部鈔五萬六

千九百錠幣帛有差鷹師等百五十萬錠二月癸未勅

軍匠戶原隸東宮者有司毋得奪之中書省臣言近侍

自內傳旨除授賞罰皆無文記懼有差違乞自今傳旨

悉以文記付中書從之甲午免天下道士賦稅乙未建

大天壽萬寧寺丁酉封諸王鄂勒哲為衛安王定遠王



永和爾為威定王竝賜金印陞翰林國史院為正二品  
賜都勒幹使者帛五百匹庚子命中書議行郊祀禮辛  
丑詔赦天下令御史臺翰林集賢院六部於五品以上  
各舉廉能識治體者三人行省行臺宣慰司廉訪司各  
舉五人免大都工都隆興差稅內郡包銀俸鈔一年江  
淮以南租稅及佃種官田者均免十分之二致仕官止  
有一子應承廕者其僕使竝免之家貧者給半俸終身  
丙午賜宿衛齊哩克昆鈔一百萬錠以歸德頻歲被水

民饑給糧兩月平陽太原地震站戶被災給鈔一萬二千五百錠三月丁未朔車駕幸上都給還安西王積年所減歲賜金五百兩絲一萬一千九百斤仍賜其所部鈔萬錠勅遼陽行省毋專決大辟以和琳所貯幣帛給懷寧王部軍庚戌以策凌巴鄂爾嘉勒姪桑節巴勒為帝師詔梁王勿與雲南行省事賜鈔千錠甲寅癸惑犯氏戊午歲星犯左執法以樞密副使高興為平章政事仍樞密副使賜親王托克托鈔二千錠紐掄博羅等金

五百兩銀千兩鈔二萬錠以濟寧去歲霖雨傷稼常寧  
州饑竝賑恤之河間益都般陽屬縣隕霜殺桑撫之宜  
黃興國之大冶等縣火給被災者糧一月夏四月庚辰  
太陰犯井雲南行省請益戍兵不許遣使詣諸路閱其  
當戍者遣之乙酉大同路地震有聲如雷壞官民廬舍  
五千餘間壓死二千餘人懷仁縣地裂二所湧水盡黑  
漂出松柏朽木遣使以鈔四千錠米二萬五千餘石賑  
之是年租賦稅課徭役一切除免戍子賜徹伯爾都勒

幹所遣使者銀千四百兩鈔七千八百錠已及東川路

蠻官阿葵以馬二百五十匹金二百五十兩及方物來

獻壬辰太白犯井中書省臣言前代郊祀以祖宗配享

臣等議今始行郊禮專祀昊天為宜詔依所議行之以

汴梁歸德安豐去歲被災潭州郴州桂陽東平等路饑

竝賑恤之五月丁未詔諸王駙馬部屬及各投下凡市

傭徭役與民均輸遣官調雲南四川福建兩廣官大都

早遣使持香禱雨戊申徵陝西儒學提舉蕭欒赴闕命

有司給以安車戊午改各道肅政廉訪司為詳刑觀察  
使聽省臺辟人用之立衍慶司正二品癸亥歲星掩左  
執法以地震改平陽為晉寧太原為冀寧復立洪澤芍  
陂屯田令河西行省平章阿薩爾領之省鬱林縣入貴  
州以晉寧冀寧累歲被災給鈔三萬五千錠寶慶路饑  
發粟五千石賑之以陝西渭南櫟陽諸縣去歲旱蠲其  
田租道州旱六月丙子朔以立皇太子遣中書右丞相  
達爾罕哈喇哈斯告昊天上帝御史大夫特古勒德爾

告太廟庚辰立皇子德壽為皇太子詔天下賜高年帛八十者一匹九十者二匹孝子順孫堪從政者量才任之親年七十別無侍丁者從近遷除外任官五品以下竝減一資諸處罪囚淹繫五年以上除惡逆外疑不能決者釋之流竄遠方之人量移內地甲午潼川霖雨江溢漂沒民居溺死者衆勅有司給糧一月免其田租以瓊州屢經叛寇隆興撫州臨江等路水汙梁霖雨為災竝給糧一月桓州宣德雨雹鳳翔扶風旱通秦靜海武

清蝗秋七月乙巳朔禁晉寧冀寧大同釀酒蠲晉寧冀  
寧今年商稅之半丙午熒惑犯氐辛亥築郊壇於麗正  
文明門之南丙位設郊祀署令丞各一員太祝三員奉  
禮郎二員協律郎一員法物庫官二員癸丑以黑水新  
城為靖安路陞祕書監拱衛司竝正三品罷福建蒙古  
字提舉司及醫學提舉司賜安西王阿南達子伊嚕特  
穆爾鈔二千錠甲寅太白經天庚申陞太府監為太府  
院壬戌以金千兩銀七萬五千兩鈔十三萬錠賜興聖

太后及宿衛臣出居懷州復置懷寧王王府官賜威遠

王永和爾鈔萬錠給大都至上都十二驛鈔一萬一千

二百錠丁卯熒惑犯房以大司徒段貞中書右丞巴特

瑪琳沁竝為中書平章政事參知政事哈喇曼濟為右

丞參知政事密喇卜和卓為左丞參議省事伊遜巴爾

為參知政事給托克托部奇爾雅蘓民糧五月沔陽之

玉沙江溢陳州之西華河溢嶧州水賑米四千石揚州

之泰興江都淮安之山陽水竭其田租九千餘石潭柳



衡雷峽滕沂寧海諸郡饑減直糴糧五萬一千六百石  
八月乙亥朔省博克遜冗員博克遜專治芻粟初惟數  
人後以各位增入遂至繁冗至是存十二員餘盡革之  
丙子給大都車站戶粟千四百七十餘石丁丑給曲阜  
林廟洒掃戶以尚珍署田五十頃供歲祀己卯以冀寧  
歲復不登弛山澤之禁聽民採捕命太常卿綽鄂昭文  
館大學士靳德進祭星于司天臺辛巳太陰犯東咸丙  
戌高胡塔奇以寶貨來獻以鈔六萬錠給其直癸巳復

立制用院乙未熒惑犯天江賜寧遠王庫庫楚鈔萬錠  
及其所部三萬錠是月涿州東安州河間嘉興蝗象州  
融州柳州旱歸德陳州河溢大名大水揚州饑九月戊  
申聖誕節帝駐蹕于壽寧宮受朝賀丁巳熒惑犯斗庚  
申車駕至自上都賜威武西寧王徹伯爾部鈔三萬錠  
冬十月丁丑朔陞都水監正三品辛巳有事于太廟丙  
戌太白經天己丑命兩廣以南軍與土人同戌庚寅駙  
馬諳達布哈來自都勒幹賜銀五十兩鈔二百錠乙未

帝諭中書省樞密院御史臺臣曰省中政事聽右丞相  
哈喇哈斯達爾總裁凡用人非與達爾罕共議者悉罷  
之戊戌詔芍陂洪澤等屯田為豪右占據者悉令輸租  
辛丑復以詳刑觀察司為廉訪司常州僧錄林起祐以  
官田二百八十頃冒為已業施河西寺勅募民耕種輸  
其租于官御史臺臣請增官吏俸命與中書省共議以  
聞括兩淮地為豪民所占者令輸租賦賜安南王陳益  
稷湖廣地五百頃諸王呼喇珠及寶喇濟蘇來賀立皇

太子賜鈔及衣服弓矢等有差十一月丁未以鈔萬錠給雲南行省命與貝參用其貝非出本土者同偽鈔論拘收諸王妃主驛券置大都南城警巡院黃勝許遣其屬來獻方物請復其子官帝不允曰勝許反側不足信如其悔罪自至則官可得命賜衣服遣之以去年冀寧地震站戶貧乏詔諸王駙馬毋妄遣使乘驛復立雲南屯田命巴延徹爾董其事給四川征戍軍士其家居大同為地震壓死者戶鈔五錠庚戌歲星太白鎮星聚於

亢癸丑歲星犯亢丙寅歲星晝見庚午祀昊天上帝于南  
郊牲用馬一蒼犢一羊豕鹿各九其文舞曰崇德之舞武  
舞曰定功之舞以攝太尉右丞相哈喇哈斯在丞相阿固  
岱御史大夫特古勒德爾為三獻官壬申太白經天十二  
月乙亥賜冀寧路鈔萬錠鹽引萬紙以給歲費丙子太白  
犯西咸地震庚寅熒惑犯壘壁陣皇太子德壽薨己亥辰  
星犯建星

十年春正月壬寅朔高麗王王昨遣使來獻方物甲辰詔

詢訪莊聖皇后昭睿順聖皇后徽仁裕聖皇后儀範中外之政以備紀錄丙午濬吳松江等處漕河四川行省臣言所在驛傳舊制以各路達嚕噶齊兼督今沿江水驛迂遠宜令所隸州縣官統治從之增置甘肅行省幹實琿穆敷等處驛傳立福建鹽課提舉司隸宣慰司庚戌濬真揚等州漕河令鹽商每引輸鈔二貫以為傭工之費丁巳太白犯建星戊午罷江南白雲宗都僧錄司汰其民歸州縣僧歸各寺田悉輸租壬戌發河南民十萬築河防丙寅以沙克

多爾部貧乏給糧兩月丁卯命諸王駙馬妃主奏請錢穀者與中書議行之陞巡檢為九品命近侍無輒驛召外郡官弛大同路酒禁封駙馬赫伯為昭武郡王營國子學於文宣王廟西偏詔各道禁沮擾鹽法以京畿雷家站戶貧乏給鈔五百錠奉聖州懷來縣民饑給鈔九百錠閏正月癸酉太白犯牽牛甲戌賑和敏所部留處鳳翔者糧三月壬午給諸王額森特穆爾所部米二千石賑安巴巴圖魯軍屯東地者糧兩月丁亥免大都今年租賦己丑太白犯壘壁陣甲午以

前中書平章政事特爾格江浙行省平章舍哩河南行省平章阿薩爾竝為中書平章政事行宣政院使張律四川行省左丞杜思敬竝中書左丞叅議中書省事劉源為叅知政事是月以曹之禹城去歲霖雨害稼民饑發陵州糧二千餘石賑之晉寧冀寧地震不止二月壬寅賑金蘭站戶不能自贍者糧兩月賑遼陽千戶沙實罕所部貧匱者糧三月辛亥中書省臣言近侍傳旨以文記至省者凡一百五十餘人令臣擢用其中犯法妄進者實多宜加遴選制



曰可陞行都水監為正三品諸路提控案牘為九品駙  
馬濟寧王曼濟岱以所部用度不足乞預貸歲得五戶  
絲從之遣大衛漢軍貧乏者還家休息一年丙辰封博  
囉為鎮寧王賜以金印都勒幹遣使來朝賜衣幣遣之  
戊午太陰犯氐己未江西福建道奉使宣撫塔布岱坐  
贓遇赦釋其罪終身不敘丁卯以額古爾布哈為中書  
左丞戊辰車駕幸上都賜安西王阿南達西平王鄂囉  
齊布哩頁鈔三萬錠納木喀巴勒萬錠從者三萬二千

錠鎮西武靖王吹巴勒所部饑發甘肅糧賑之是月大同路暴風大雪壞廬舍明日雨沙陰霾馬牛多斃人亦有死者三月戊寅歲星犯亢己卯崆古王遣使來貢方物乙未慮大都囚釋上都死囚三人賜駙馬曼濟岱鈔萬錠道州營道等處暴雨江溢山裂漂蕩民廬溺死者衆復其田租以濟州任城縣民饑賑米萬石給千家糶蘇達巴部糧三月柳州民饑給糧一月河間民王添嘉努弑父磔裂於市夏四月庚子朔詔凡匿鷹犬者沒

家貲之半答三十來獻者給之以賞甲辰樞密院臣言

太和嶺屯田舊置屯儲總管府專督其程人給地五十畝歲輸糧三十石或佗役不及耕作者悉如數徵之人致重困乞令軍官統治以宣慰使伊呀森布哈總之視軍民所收多寡以為賞罰從之丁未命威武西寧王徹伯爾領甘肅等地軍站事辛酉填星犯亢壬戌雲南羅雄州軍火主阿邦龍少結豆溫匡虜普定路諸蠻為寇右丞汪維能進討賊退據越州諭之不服遣平章伊蘇

岱爾率兵萬人往捕之兵至曲靖與惟能合從諸王寶保齊伊勒吉岱等進壓賊境獲阿邦龍少斬之餘衆皆潰命伊蘇岱爾留軍二千戍之其從軍有功者皆加賞賚癸亥置崑山嘉定等處水軍上萬戶府甲子倭高有慶等抵慶元貿易以金鎧甲獻命江浙行省平章阿喇卜丹等備之賜梁王薩克織鈔千錠是月以廣東諸郡吉州龍興道州柳州漢陽淮安民饑贛縣暴雨水溢賑糧有差鄭州暴風雨雹大若鷄卵麥及桑棗皆損蠲今年

田租真定河間保定河南蝗五月辛未大都旱遣使持  
香禱雨壬午增河間山東兩浙兩淮福建廣海鹽運司  
歲煮鹽二十五萬餘引癸未詔西番僧往還者不許馳  
驛給以舟車禁御史臺宣慰司廉訪司官毋買鹽引乙  
酉以同知樞密院事塔爾古岱塔喇海竝知樞密院事  
遣高麗國王王昨還國仍署行省以鎮撫之其國僉議  
密直司等官竝授以宣敕封駙馬托克特穆爾為濮陽  
王賜金印公主孟古台為鄆國大長公主丁亥詔命右

丞相哈喇哈斯達爾罕左丞相阿固岱等整飭庶務凡  
銓選錢穀等事一聽中書裁決百司勤怠悉以名聞賜  
威武西寧王徹伯爾鈔三萬錠遼陽益都民饑賑貸有  
差大都真定河間蝗平江嘉興諸郡水傷稼六月癸卯  
御史臺臣言江南行臺監察御史嘉琿劾江浙行省宣  
使李元不法行省亦遣人撫拾嘉琿不令檢覈案牘中  
書省臣復言嘉琿等不循法度擅遣軍士守衛其門榜  
掠李元誣指行省等官實沮省事詔省臺及伊克扎爾

古齊同訊之癸丑太陰犯羅堰上星己未歲星犯亢壬戌來安路總管岑雄叛湖廣行省遣宣慰副使和塔拉特穆爾招諭之雄令其子世堅來降賜衣物遣之復准西道廉訪司大名益都易州大水景州霖雨龍興南康諸郡蝗秋七月庚辰太陰犯牽牛辛巳釋諸路罪囚常赦所不原者不與宣德等處雨雹害稼大同之渾源隕霜殺禾平江大風海溢漂民廬舍道州之武昌永州之興國黃州沅州饑減直賑糶米七萬七千八百石八月

壬寅歲星犯氐熒惑犯太微垣上將開成路地震王宮  
及官民廬舍皆壞壓死故秦王妃伊囉幹等五千餘人  
以鈔萬三千六百餘錠糧四萬四千一百餘石賑之辛  
亥賜王姪阿穆爾克鈔三千錠丁巳京師文宣王廟成  
行釋奠禮牲用太牢樂用登歌製法服三襲命翰林院  
定樂名樂章成都等縣饑減直賑糶米七千餘石九月  
己巳熒惑犯太微垣右執法壬申以聖誕節都勒幹遣  
庫春等來賀壬午熒惑犯太微垣左執法冬十月甲辰



太白犯斗丁未有事于太廟辛亥太陰犯畢甲寅太陰  
犯井丁卯安南國遣黎亢宗來貢方物青山叛蠻紅犵  
獠等來附仍貢方物賜金幣各一吳江州大水民乏食  
發米萬石賑之十一月己巳車駕還大都辛未歲星犯  
房壬申太陰犯虛甲戌熒惑犯亢丁亥武昌路火給被  
災者糧一月戊子熒惑犯氐辛卯太陰犯熒惑丙申安  
西王阿南達西平王鄂囉齊所部皆乏食給米有差益  
都揚州辰州歲饑減直賑糴米二萬一千餘石十二月

壬寅太白晝見乙巳歲星犯東咸壬子蘇克徹爾等十  
三站乏食給糧三月乙卯帝有疾禁天下屠宰四十二  
日丙辰遣宣政院使實迪等禱于太廟諸王哈喇班第  
部民潰散詔諭所在敢匿者罪之戊午太陰犯氐癸亥  
瓊州臨高縣那蓬洞主王文何等作亂伏誅磁州民田  
雲童弑母磔裂于市是歲斷大辟四十四人

十一年春正月丙辰朔帝大漸免朝賀癸酉崩于玉德  
殿在位十有三年壽四十有二乙亥靈駕發引葬起輦

谷從諸帝陵是年九月乙丑諡曰欽明廣孝皇帝廟號成宗國語曰諤勒哲圖皇帝成宗承天下混壹之後垂拱而治可謂善於守成者矣惟末年連歲寢疾凡國家政事內則決于宮壺外則委於宰臣然其不致於廢墜者則以去世祖為未遠成憲具在故也

元史卷二十一

元史卷二十一考證

成宗本紀大德七年冬十月以故知府容直妻適姑為  
總管 案滇志容直劾順賊未平而沒其妻能宣力  
戎行故有是命

八年七月太原之陽武河溢 案地理志太原路下無  
陽武縣名陽武係隸于汴梁路刻本訛舛但無他本可  
考姑仍原文

九月十一月丁未以鈔萬錠給雲南行省命與貝叅用

案通考云貝作𧈧雲南𧈧以一為庄四庄為手四  
手為苗四苗為橐